

repetier le soir, les instructions qu'elles auoient entendues pendant le iour, dans nostre Chapelle; Dieu voulut se feruir de leur pieté, pour la conuersion de leur Pere; car comme ie le fus voir, ie le trouuay sçauant en nos mysteres, [90] & le Saint-Esprit operant dans son cœur, par le ministere de ses filles, il demanda avec passion d'estre Chrestien. Ce que ie luy accorday par le Baptisme, que ie ne iugeay pas à propos de differer, le voyant en danger de mort. Dés lors il ne voulut point qu'on exerçast autour de sa personne, aucunes longleries pour sa guerison; il ne vouloit plus entendre parler que du salut de son ame; & vne fois comme ie luy recommandoie de prier souuent Dieu; Sçache, mon frere, me dit-il, que continuellement ie jete du petun au feu, disant, c'est toy qui as fait le Ciel, & la Terre, que ie veux honorer. Je me contentay de luy faire connoître, qu'il n'estoit pas neceffaire, d'honorer Dieu de cette façon, mais seulement de luy parler de [91] cœur, & de bouche. En fuitte, le temps estant venu, auquel les Sauuages demandent, qu'on accomplisse leurs desirs, par vne ceremonie qui tient beaucoup des Bachanales, ou du Carnual; Nostre bon vieillard fit faire recherche par toutes les Cabanes, d'une piece d'étoffe bleüe; disant que c'estoit là son desir, parceque c'estoit la couleur du Ciel, auquel, dit-il, ie veux auoir toujours le cœur, & la pensée. Je n'ay point veu de Sauuage plus prest à prier Dieu, que luy; Il repetoit entre autres prieres, celle-cy, avec vne ardeur extraordinaire. Mon Pere, qui estes au Ciel, mon Pere, vostre nom soit sanctifié; trouuant plus de douceur en ces mots, qu'en ceux-cy que ie luy